

**ԴՈՆ ԿԻԽՈՏՆ ԻԲՐԵՎ ԻՍԴՄԱՆԱԿԱՆ ՈԳՈՒ
ԿԵՐՊԱՐԱՆԱԿՈՐՈՒՄ ԸՍՏ ՄԻԳԵԼ ԴԵ ՈՒՆԱՍՈՒՆՈՅԻ**

19-րդ դարում «Դոն Կիխոտ» վեպը մտնում է համաշխարհային գրականության մեջ: Այս ժամանակաշրջանում Գերմանիայում, Ֆրանսիայում, Անգլիայում, Ռուսաստանում ստեղծվեցին Դոն Կիխոտի տարբեր փիլիսոփայական, հրապարակախոսական մեկնաբանությունները:

Սակայն Սերվանտեսի հայրենիքում՝ Իսպանիայում, համաստեղծագործությունը Սերվանտեսի հետ գրեթե չի կայանում:

«Երբ սկսվեց գերմանական ռոմանտիկների մեծագործական գործունեությունը, - գրում է Վ. Բազմուն, - և Սերվանտեսը ճանաչվեց հանճարեղ (եթե ոչ առաջին գրող), իսկ վեպը՝ երկրագնդի վրա մարդու տեղի և դերի գաղափարական առանցք, Իսպանիայում Դոն Կիխոտ կերպարի մեջ բարեհաջող կերպով շարունակում էին տեսնել ազդեցիկ միջոց խելքի և սրտի մոլորության դեմ, իսկ նրա հեղինակի մեջ՝ մի գրողի, որն արժանի է ուշադրության նոր ժամանակներում»¹:

Իսպանացիները միակողմանի էին դիտում սերվանտեսյան հերոսին և իրենց հետազոտություններում հենվում էին հիմնականում սոցիոլոգիական և հոգեբուժական մեթոդների վրա:

«98-ի սերունդ» գաղափարական հոսանքը իսպանական մշակույթի պատմության ամենահետաքրքիր երևույթներից մեկն է, որն իր անվանումը ստացել է իսպանաամերիկյան պատերազմի կապակցությամբ: Այն ավարտվեց 1898 թվականին՝ տնտեսապես հետամնաց Իսպանիայի խայտառակ պարտությամբ, որի հետևանքով էլ նա կորցրեց իր գաղութները:

«98-ի սերունդի» ներկայացուցիչներ Միգել դե Ունամունոն՝ հոսանքի գաղափարական և հոգևոր առաջնորդը, Գանիվետը, Ասորինը, Մաչադոն հեղաշրջում կատարեցին իսպանական գրականության մեջ: Դրանք այս գրական ուղղությանն է պատկանում սերվանտեսյան վեպի երկրորդ հայտնաբերման պատիվը: Այս հեղինակների մոտ «Դոն Կիխոտ» վեպը ձեռք է բերում ազգային խնդրի ձևավորման արժեք: Դոն Կիխոտի մասին խորհելիս՝ «98-ի սերունդի» ներկայացուցիչները, մտորում են Իսպանիայի ժամր կյանքի, պատվի, ազգային արժանապատվության մասին, որոնք համարվում են իսպանական ազգային գծեր և թույլ չեն տալիս իսպանական ժողովրդին հպատակվել այլ ազգերի:

¹ Багню В.Е, Дорогами "Дон Кихота", М., 1988, с.255.



«Դոն Կիխոտը,- գրում է Ի.Տերտերյանը,- դարձել էր եզրույթ, հասկացություն, որը գլխավորն ու ամենագործածականն էր այն լեզվում, որով խոսում էին միմյանց և ընթերցողի հետ այս ժամանակաշրջանի մտածողներն ու գրողները»²։

«98-ի սերնդի» հեղինակների մոտ Դ.Կիխոտի մեկնաբանությունները հաճախ հոգեբանական են և սրանք հետաքրքիր են հենց այն պատճառով, որ փորձում են պատասխանել ժամանակակից իսպանացու առջև ծառացած խնդիրներին։ Գեղարվեստական կերպարը՝ Դոն Կիխոտը, անջատվում է ստեղծագործությունից և հեղինակից և դիտարկվում անկախ։ Ամեն ոք յուրովի է բացահայտում, մեկնաբանում Կիխոտի կերպարը՝ ըստ իրեն հուզող հոգևոր խնդիրների։

1896 թվականին Միգել դե Ունամունոն առաջին անգամ անդրադառնում է Սերվանտեսի «Դոն Կիխոտ» վեպին՝ գրելով. «Տխուր Պատկերի Ասպետը» էսսեն։ Այստեղ Մ.Ունամունոն հրավիրում է ընթերցողին մտորել Դ.Կիխոտի խորհրդանշական կերպարի շուրջ՝ իբրև իսպանական ժողովրդի խորհրդանիշ։ Այն իրականության կոնկրետ իրականացում է, և որքան իդեալական է այս կերպարը, այնքան՝ ռեալ։ Մ.Ունամունոն մանրամասնորեն ուսումնասիրել է վեպը և դուրս է գրել 17 հատված, որոնցում նկարագրված է Դոն Կիխոտի կերպարը։

Մ.Ունամունոն այս էսսեում խոսում է ճշմարտության մասին. «Իսկ ինչ է ճշմարտությունը,- գրում է Ունամունոն,- ինչն է այստեղ ճշմարիտը և ինչում է նրա ուժը։ Ճշմարտությունը կոնկրետ փաստ է, ամեն ինչ պարփակող, առեղծվածային և ունիվերսալ, որն իր արմատներով տանում է դեպի հրաշքներ։ Արարքները, վերածվելով մանրուքների, վերլուծության և դիախատման ժամանակ դառնում են փոշի, փաստեր, և վերանում է կենդանի իրականությունը։ Դ.Կիխոտի ճշմարտության ուժը նրա մարդկային և կաստիլիական հոգում է, և ճշմարտությունը հայտնաբերվում է նրա դեմքին, որտեղ արտացոլվում է հոգին»³։ Մյուս հարցումն այն է, թե արդյո՞ք մենք պետք է տարանջատենք Դոն Կիխոտի հոգին արտաքինից, կամ արտաքինը հոգուց։ Հեղինակը համակարծիք է հենց Դ.Կիխոտի հետ, որը պնդում է, որ մարդկային բնավորության և արարքների հիման վրա կարելի է որոշել այդ մարդու դիմագծերը, մաշկի գույնը և հասակը։ Դոն Կիխոտի համար ճշմարիտը իր կաստիլիական փիլիսոփայությունն էր, այն իրականությունը, որի շնորհիվ սխրագործություններից կարելի է որոշել դիմագծերը, արտաքինից՝ հասնել ներքինին։

Ըստ հեղինակի, Դոն Կիխոտին պատկերել ցանկացող նկարիչը պետք է առաջին հերթին բացահայտի Կիխոտի հոգին, ոգեշնչվի նրա սխրագործու-

² Тертерян И.А. Испытание историей: Очерки испанской литературы 20-го века, М., 1973, с.22.

³ М-де Унамуну, Рыцарь Печального Образа, стр.233/Житие Дон Кихота и Санчо по Мигелю де Сервантесу Сааведре, объясненное и комментированное Мигелем де Унамуну, изд. "Наука", Санкт-Петербург, 2002г.

թյուններով, վեհությամբ, որով ճանապարհ գտնի իր հոգուց դեպի Կիստոտի հոգին: Սակայն սրա համար անհրաժեշտ է, որ նկարիչը հոգու խորքում Դոն Կիստոտ լինի:

Ինչպես գրում է Ունամունոն. «Դ.Կիստոտին պատկերել առանց նրան այլանդակելու՝ նշանակում է տալ նրա հոգուն մարմին, որի միջով կարծես նշարվում է այդ հոգին և կրում Սապետի անհատականություն: Սա նշանակում է գեղանկարչության մեջ հասնել սիմվոլիկության՝ լի մեծագույն էքսպրեսիայով և ուժով, այսինքն՝ ստեղծել մարդ-սիմվոլի կերպար, որի համար պետք է փնտրել լամանացի հիդալգոյի հոգին ոչ միայն Սիդ Լմեդի անմահ էջերում, այլ նաև նրանցից դուրս»⁴: Կիստոտը ապրում է ոչ թե միայն Սերվանտեսի վեպի էջերում, և իսպանացի նկարիչը կարող է նրա կերպարանավորումը գտնել իր իսկ հոգու խորքերում, եթե փնտրի սիրով, ամեն անգամ ավելի խորը ներթափանցելով:

Ունամունոն կոչ է անում բոլորին ընկղմվել սեփական հոգու խորքերը, փորձել գտնել այնտեղ «Դոն Կիստոտին», որն ապրում է ցանկացած մարդու մեջ: Հեղինակը պնդում է, որ ցանկացած ոք կարող է նաև ստեղծել Դոն Կիստոտի կերպարը, եթե ներթափանցի իր հոգու խորքերը, ուսումնասիրի իր էությունը, և պարտադիր չէ, որ դա անի միայն նկարիչը: Ցանկացած մարդ, ով ի գորու է ուսումնասիրել իր հոգին, ով հարցեր է տալիս ինքն իրեն ու փորձում պատասխանել, ով համարձակվում է հիշել իր ով լինելը, կարող է ստեղծել Դոն Կիստոտի նկարը իր հոգում: Միայն թե դա անելու համար մարդը պետք է զինվի համբերությամբ և լինի ուշադիր: Ասվածից կարելի է հետևություն անել, որ Ունամունոն կոչ է անում արվեստագետներին (և ոչ միայն նրանց) լինել ռեֆլեքսիվ, որը դժբախտաբար մեծամասամբ բացակայում է նաև մեր օրերում: Ունամունոյի ցանկացած դիտարկում, քննադատություն ինքնին վկայում է այս կամ այն երևույթի բացակայությունը:

Շատ մարդիկ ապրում են այն թյուր համոզմունքով, որ Կիստոտը երբևիցե գոյություն չի ունեցել, և Ունամունոն անհրաժեշտ է համարում ապացուցել մարդկանց, որ աշխարհում գոյություն ունեցել են թափառական ասպետներ: Թափառական Սապետի կերպարի մեջ Ունամունոն տեսնում է արդարությունը պաշտպանողի, ճշարտությունը վերականգնողի, և այս իսկ պատճառով նա ամեն զնով ուզում և փորձում է ապացուցել Դոն Կիստոտի իրական գոյությունը, ով ներառել է իր մեջ թափառական ասպետի բոլոր դրական գծերը, և որին կարելի է համարել թափառական ասպետի իդեալ: Այստեղ նույնպես Դոն Կիստոտի մասին մտորելու ընթացքում Ունամունոն բարձրացնում է ևս կարևոր մի հարց, այն է՝ ճշարտություն և ճշարտության վերականգնողի խնդիրը: Արդի փուլում, երբ աշխարհի պատկերը դարձել է պոլյուրալիստական, չկա

⁴ Նույն տեղում, էջ 234:

երևույթի միասնական, ամբողջական պատկերացում, ուստի ճշմարտությունը կորցրել է իր «դեմքը», իսկ ճշմարտության վերականգնողը կարող է դառնալ ուստոպիստական կերպար, լինել ծաղրի առարկա, հայտնվել ծիծաղելի իրավիճակներում:

Ունամունոն համոզված է, որ ժողովուրդը պետք է օրինակ վերցնի իր իսկ լեգենդների, միֆերի, վեպերի հերոսներից: Նա տարբերություն չի դնում սրանց միջև և կարծում է, որ ցանկացած հերոս օրինակ կարող է ծառայել իր ժողովրդի համար, նույնիսկ մտացածին հերոսը, ինչպիսին է Դոն Կիխոտը:

«Գիտությունը, որն ամեն ինչ ենթարկում է ուսումնասիրության,- գրում է Ունամունոն,- սպանում է կյանքը և նրա հետ մաս ճշմարտությունը, որում միահյուսվում են լեգենդն ու պատմությունը, երբ մխրճում է հերձադանակը կենդանի հյուսվածքի մեջ, կամ երբ փորձում է սահմաններ դնել լեգենդի ու պատմության միջև մի կողմից, մյուս կողմից՝ վեպի, միֆի և այլաբանության միջև: Այդժամ կյանքի հետ վերանում է մաս ճշմարտությունը և մնում է լոկ ճշմարտամեամությունը: Միայն սպանելով կյանքը (իսկ նրա հետ մաս ճշմարտությունը), կարելի է առանձնացնել պատմական հերոսին վեպի, միֆի, հեքիաթի, լեգենդի հերոսից և հաստատել, որ ինչ-որ մեկը հաստատ գոյություն է ունեցել, մյուսը՝ կիսով չափ, իսկ երրորդը՝ ոչ»⁵: Սակայն ըստ հեղինակի, գոյություն ունենալ նշանակում է ապրել, և ով գործում է՝ գոյություն ունի: Իսկ եթե գոյություն ունենալ նշանակում է գործել, ապա Դոն Կիխոտը գոյություն է ունեցել, քանզի նա գործում է մեր հոգիներում նույնքան եռանդուն, որքան պատմական հերոսները՝ իրականությունում: Դոն Կիխոտը կենդանի է, քանի որ ապրում է այն մարդկանց մեջ, ովքեր ընթերցել են այս վեպը: Դոն Կիխոտը առիթ է տալիս մտածելու շատ կարևոր բաների մասին: Եվ եթե մարդիկ վեպի ընթերցումից հետո մի փոքր «կիխոտանում են», ուրեմն Կիխոտը գործում է, նշանակում է գոյություն ունի: Երբ ընթերցում ես, «անիրականը»՝ գրական կերպարը, դառնում է «իրական»: Իսկ երբ իրական է դառնում, ուրեմն ճշմարիտ է: Այստեղ Ունամունոն բարձրացնում է ռեցեպտիվ գեղագիտության կարևոր հարցադրումներից մեկը՝ տեքստ – ընթերցող փոխհարաբերությունը:

Ապագա հերոսը սկզբում ծնվում է ժողովրդի հոգում և հետո լույս աշխարհ է գալիս: Ժողովրդի հոգին խմորում է նրան իր հոգում: Եթե Սերվանտեսը ստեղծել է Դոն Կիխոտին, ապա իսպանացի ժողովրդի մեջ կար այն սերմը, որը ծնունդ է տվել այս հերոսին: Ունամունոն գտնում է, որ կերպարը ծնվում է ժողովրդի ծոցից: Մյուս կողմից հեղինակ – Սերվանտեսը՝ մեղիում է, նա միջոց է դառնում ազգային ինքնությունը պարզելու, բացահայտելու առումով:

Ամեն մի ժամանակաշրջանում երևան է գալիս մի հերոս, որն անհրաժեշտ է տվյալ պահին: Սա հասկանալի է, քանի որ այդ հերոսը ներառում է իր

⁵ Նույն տեղում, էջ 234:

Ժամանակի գաղափարները, որի միջոցով հեղինակը գգում է իր ժամանակի պահանջները:

«Հերոսը ժողովրդի անհատականացված կոլեկտիվ հոգին է, նրա սիրտը բաբախում է համահունչ ժողովրդի սրտին, բայց նրա զգացողությունները ավելի սուբյեկտիվ են: Սա ժողովրդի նախատիպն է և նրա կերպարանավորումը, ժողովրդի հոգևոր էությունը: Եվ չի կարելի ասել, թե հերոսը իր ետևից է տանում ժողովրդին, ոչ, հերոսը ժողովրդի գիտակցությունն է, նրա ծգտումների բառային արտահայտումը»⁶: Հատվածից երևում է, որ Ունամունոն մեծ տեղ է հատկացնում արվեստին, գրականությանը, որտեղ կերպարը առաջ է ընկնում ժողովրդից, դառնում է ուղեմիշ: Այժմյան փուլում գրականությունը, գրական կերպարը կորցրել է իր ուժը, որովհետև չի ընթերցվում, մարդկային զանգվածների հետաքրքրությունից դուրս է: Կերպարը ուժ է, ազգային ինքնության խտացումն է, այն մնում է գեղարվեստական տեքստի շրջանակներում՝ ստանալով պրակտիկ կիրառություն:

«Հաճախ հերոսը, - շարունակում է Ունամունոն, - որի լուսավոր ծնունդը նախազգում են, շատ վսեմ է, որպեսզի համոզես զա մարդու տեսքով, երբեմն էլ հասարակությունն է չափազանց սահմանափակ նրան ընդունելու համար: Եվ այդ ժամանակ ծնվում է իդեալ՝ առասպելական, կամ գրքային, որին ծնունդ է տալիս տղամարդու երևակայությունը»⁷: Այս հերոսները ոչ պակաս իրական են, քան մսից և արյունից կազմված հերոսները: Մ.Ունամունոն համեմատում է Կիխոտին Ֆրանսիսկո Պիսարրոյի, Էռնան Կորտեսի⁸, անգամ Սուրբ Դիեգո Մատամորոսի⁹ հետ: Սերվանտեսի հերոսին հավասարեցնելով պատմական դեմքերին՝ հեղինակը ևս մի անգամ ընդգծում է, որ կարևոր չէ, թե ինչ հերոս է, կարևորն այն ազդեցությունն է, որով նա ներգործում է ժողովրդի վրա, ինչ օրինակ է նա տալիս մարդկանց, ինչին է նա ծառայում, ինչ իդեալների կրող է: «Գործել նշանակում է գոյություն ունենալ, - գրում է Ունամունոն, - իսկ որքան մարդիկ, որոնք իրականում գոյություն ունեն, գտնվում են այսօրվա նեղ շրջանակներում, ստեղծում են ավելի քիչ բան, քան խենթացած Ալոնսո Կիխանո Բարին»¹⁰: Սկսած ինչի մասին է մտորում Միգել դե Ունամունոն այս էսսեում: Նա ցանկանում է ցույց տալ, որ մարդը՝ մսից ու արյունից, անպայման պետք է հիշի իր ժողովրդի փառավոր անցյալը, պետք է ոգեշնչվի իր լեգենդների, առասպելների, վեպերի հերոսներից, և ոչ միայն, այլև իրական պատմական հերոսներից, որպեսզի կերտի իր ներկան և ապագան, գործի, այլ ոչ թե հանձնվի հոսանքին, պայքարի և ձգտի հաղթանակի: Ավելին՝ հայացքն

⁶ Նույն տեղում, էջ 235:

⁷ Նույն տեղում, էջ 235:

⁸ Ֆրանսիսկո Պիսարրո, Էռնան Կորտես՝ հայտնի կոնկիստադորներ:

⁹ Իսպանիայի հովանավոր սուրբ. Matamoros բառացի նշանակում է արաբներին սպանող:

¹⁰ Նույն տեղում, էջ 234:

անցյալին հնարավորություն է տալիս գիտակցել ներկան, դարձնել այն ավելի իմաստալից, իմաստավորված, որով հնարավոր կլինի կերտել ապագան։ Սա է ազգային ինքնության ձևավորման մոդելը։ Մեր կյանքում գերզգայուն կերպով հայացքը ուղղվում է դեպի անցյալ, որը հնարավորություն չի տալիս իմաստավորել ներկան, ներկա վիճակը։ Բացի այդ չկա քննադատական վերաբերմունք անցյալի նկատմամբ։ Սրա բացակայության դեպքում անցյալը չի վերաիմաստավորվում, թարմացվում, չի ստանում նոր տեսք։ արդի պահանջները բավարարելու համար։ Երբ մենք ունենանք այս մոտեցումը անմիջական կդառնա ներկա- անցյալ կապը, որով դյուրին կլինի կերտել ապագան։ Անցյալը- ներկան - ապագան կազմում են հավերժը, իսկ հավերժը ճշմարիտ է։

Ունամունոն պնդում է, որ Կիխոտից ավելի շատ բան է մնացել, քան կմնա մեզանից հետո, չնայած այն բանի, որ մենք միս ու արյունից ենք, իսկ նա՝ ոչ, քանի որ նա համարձակվել էր պայքարել ընդունված կանոնների դեմ, իր խղճի համաձայն։

«Այն անցողիկ ու պատահական աշխարհում,- շարունակում է Ունամունոն,- մեր ոգին անհրաժեշտաբար և մշտական արարում է։ Սրանում է մեծագույն իրականությունը. ամբողջ պատմությունը իդեալականացում է հանուն իդեալի գոյության»¹¹։ Դենց իսպանական ժողովրդի ոգին է, որ ստեղծել է Դոն Կիխոտին, իր որդիներից մեկի՝ Սերվանտեսի միջոցով։ Եվ այժմ Դոն Կիխոտը իրեն ստեղծած ոգու արտահայտությունն է։

Լեզենդի և գրքի հերոսը՝ պատմական դեմքի նման, կարող է ստանալ ժողովրդի հոգու կերպարանավորում։ Այսպիսի հերոսները գործում են, հետևաբար գոյություն ունեն։ Կաստիլիական հոգին ծնունդ է տվել Դոն Կիխոտին, որը կենդանի է ինչպես այդ հոգին։

Կիխոտի կերպարի մեջ Ունամունոն տեսնում է իսպանացու հոգին և Կիխոտի տխրության մեջ՝ պայքարող ազգի տխրությունը, որը հնազանդ է իր ճակատագրին։ Կիխոտը փորձում է կոտրել Աստծո մտրակը՝ նրա ձեռքը համբուրելով։

Դոն Կիխոտի լավատեսությունը մանկական չէ, ոչ էլ ծերունական հոռետեսություն, այլ տխրություն՝ լի առողջ հնազանդությամբ և կենսական պարզությամբ։ Ունամունոն գրում է. « ոգին՝ աշխարհի թափանցելուն զուգընթաց, հարստանում է նրանով։ Դոգին և աշխարհը միահյուսվում և ձևավորում են իրար, իսկ մարմինը՝ ավելի ու ավելի է դառնում ոչ թե հանդերձանք, այլ ոգու արտահայտություն։ Գուցե գա մի օր, երբ ամենափանալի մարմինը դառնա ամենաաքանչելի հոգու շտեմարան»¹²։ Ասվածից երևում է, որ Ունամունոն ցանկանում է տեսնել իր ժողովրդին գերազանց վիճակում։ Նա երազում և հավատում է, որ

¹¹ Նույն տեղում, էջ 235:

¹² Նույն տեղում, էջ 239:

կգա մի օր, երբ իսպանական ազգային ոգին, որի կերպարանավորումն է Ղոն Կիխոտը, կծուլվի ժողովրդի հետ: Գուցե այդ ժամանակ մարմին-իսպանիան դառնա ոգի-Ղոն Կիխոտի շտեմարանը:

«Դիմագծերը, գրում է հեղինակը,- հավանաբար անցնում են ժառանգաբար: Երկարատև տառապանքը իր հետքն է թողնում դեմքի վրա, առաքինությունները զարդարում են այն, իսկ արատները՝ այլանդակում: Միջավայրին հարմարվելուն զուգընթաց, մարդու դեմքը ավելի ու ավելի է դառնում հոգու հայելի, քանզի դեմքը, արտացոլելով սուբյեկտի և միջավայրի դարավոր փոխազդեցության արդյունքը, ժառանգում է դիմագծեր, մի կողմից նախնիներից, մյուս կողմից՝ ձեռք են բերվում կյանքի ընթացքում: Վերջ ի վերջո դեմքը կենթարկվի հոգուն, և նրա արտահայտությունը կդառնա ճշմարիտ, երբ սուբյեկտն ու միջավայրը լիակատար ներդաշնակ կլինեն»¹³: Ըստ էության Ունամունոն առաջ է քաշում ներքին- արտաքին հարաբերության ներդաշնակության խնդիրը, որի համաձայն, մեկը մյուսով պատճառաբանված են: Եթե անտիկ դարաշրջանում ընդունելի և համադրելի էին գեղեցիկն և ճշմարիտը, գեղեցիկնրու բարին, ապա մեր օրերում մեկը մյուսից բաժանվել- հեռացել են:

«Ղոն Կիխոտի դիմանկարը,- կարծում է Մ. Ունամունոն,- պետք է նկարել հավատալով նրա գոյությանը, բացահայտելով նրա նյութական գոյությունը հոգու միջոցով: Պետք է գրել Կիխոտի դիմապատկերը հավատալով, որ նա գոյություն ունի, ապրում և գործում է, ինչպես սրբերի և հրեշտակների գոյությանն են հավատացել նրանց պատկերող պրիմիտիվիստ նկարիչները»¹⁴: «Տխուր Պատկերի Ասպետի գոյությունը ռեալ է քանի որ իդեալական է, իրական է, քանի որ գործող է»¹⁵, սա է Ունամունոյի էսսեի հիմնական առանցքը:

¹³ Նույն տեղում, էջ 239:

¹⁴ Նույն տեղում, էջ 242:

¹⁵ Նույն տեղում, էջ 243: